



Komunikadu Imprensa
15 Janeiru 2024
Munisípiu Covalima

Suku Ogues realiza serimónia re-tara-bandu
Xefe Suku rekomenda JSMP kontinua hakbesik justisa ba comunidade Suku
Oques no apoia implementasaun regra tara-bandu

Iha 29 Dezembru 2023, JSMP partisipa iha serimónia re-tara-bandu iha Suku Ogues, Postu Administrativu Maucatar, Munisípiu Covalima, ne'ebé realiza ho partisipasaun mai hosi autoridade munisipál, autoridade lokal, comunidade Suku Oques, comunidade suku viziñu sira, intelektual, veteranu sira no lia-na'in sira.

Serimónia revizaun re-tara-bandu iha suku refere ho objetivu atu hadi'ak liután regra tara-bandu refere nune'e bele refléta ba kondisaun no nesesidade comunidade Suku Oques nian.

Regra tara-bandu ne'e regula kona-ba bandu atu estraga ai-horis, animal no mós bandu ba viola ema nia direitu sira no sei uza regra ne'e atu aplika sansaun bainhira comunidade sira kontra regra tara-bandu refere.

Regra tara-bandu ne'e aplika ba comunidade Suku Oques no comunidade suku seluk ne'ebé mai halo hahalok ne'ebé kontra bandu iha áreia Suku Oques nian.

"JSMP iha komitmentu atu hakbesik justisa ba iha comunidade suku Oques no kontinua ajuda suku sira atu hadi'ak liután sira nia regra-tara-bandu sira hodi harmoniza ho lei nasonál maibé nafatin respeita ba iha kustume di'ak sira. Iha parte seluk, JSMP mós haksolok tebes tanba autóriidade lokal sira liliu xefe suku foun ho estrutura suku Oques simu JSMP ho di'ak iha prosesu revizaun no simu JSMP nia hanoin sira ba interese comunidade nian," dehan Sra. Ana Paula Marçal, Diretora Ezekutiva JSMP.

Reprezentante Prezidente Autoridade Munisípiu, Sr. Antonio da Rezorisaun Barros nu'udar Sekretáriu Munisípiu Covalima, iha nia intervensaun kontente tebes ho prezensa JSMP liuhosi programa sira iha suku Ogues, nune'e bele ajuda autoridade lokál sira halo revizaun hodi realiza re-tara-bandu no sei implementa iha suku refere.

Prezidente autoridade ne'e husu ba JSMP atu kontinua haluan tan programa ne'e ba suku seluk hodi hasae koñesimentu autoridade lokál sira nian iha suku idak-idak.

Parte seluk Administradór Postu Administrativu Maucatar, Sr. Constantinho do Carmo Cardozu, iha nia intervensaun husu ba Komunitade sira atu respeitu regra ne'e, tanba durante ne'e nia observa katak ema barak la respeitu malu ona no espera hosi regra ne'ebe mak iha ona ne'e bele halo mudansa ba attitude moris comunidade sira.

Nia mós hato'o nia agradese ba JSMP tanba bele apoia suku hodi realiza revizaun ba regra Tara-Bandu hodi bele aplika iha suku ne'e no mós halo ona dialogu entre autoridade judisiál ho comunidade sira hodi bele hatene lala'ok Lei nian.



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Reprezentante Ministériu Komérsiu Industria, Diretór Jerál Biodiversidade apresia tebes ho estrutura suku Ogues ne'ebé maka organiza eventu ida ne'e no agradese mós ba JSMP ne'ebé maka serbisu hamutuk ho autoridade lokál sira hodi bele hadi'ak liután regra tara-bandu ne'ebé maka durante ne'e seidak re-ativa tanba dalaruma regra ne'e rasik laiha benefisiu ba comunidade sira.

Diretór ne'e konsidera regra tara-bandu bele hametin liután biodirversidade no mós halo konservasaun liga ho kultura no fó hanoin tan ba autóridade suku sira hotu katak Governu liuhosi Ministériu Komérsiu Industria pruntu apoiu tuir kbiit ne'ebé iha bainhira suku sira iha hanoin atu kria regra tara-bandu ka halo revizaun ba regra tara-bandu.

Diretór Jerál mós salienta katak programa ne'e hetan apoiu hosi MCI rasik tuir proposta ne'ebé maka haruka ba no ohin bele organiza atividade ne'e la'ó ho di'ak tebes

Xefe Suku Ogues, Sr. Febriano Pereira iha abertura hateten katak serimónia re-tara-bandu ne'e realiza ho objetivu atu kontribui di'ak liután ba Governu nia programa kona-ba proteze ambiente no promove arte no kultura iha sociedade sira. Liuhosi motto Tara-bandu ne'ebe hateten katak Re-organiza, haburas, hamatak riku-soin Suku Ogues. Atividade ne'e, hetan apoiu makas hosi JSMP ne'ebé estabelese akordu ida ho estrutura suku Oques durante tinan ida iha Suku Ogues.

Xefe suku mós rekoñese katak hosi peskiza ne'ebé maka JSMP sira halo deskobre erru barak iha regra tara-bandu anteriór nian, regra tara-bandu antes ne'e barak maka laiha nia benefisiu ba comunidade tanba bainhira aplika sansaun, sansaun ne'e todan liu tiha fali ema nia kulpa no kapasidade. Failansu seluk mak laiha komite ida ne'ebé atu tau-matan ba aplikasaun regra refere. Xefe suku agradese tebes ba JSMP nia programa ne'ebé tulun tebes autoridade lokál sira hodi bele halo revizaun ba regra anteriór sira no apoiu mós autoridade sira halo konsultasaun ba comunidade antes halo revizaun ba regras ne'e. Xefe suku husu nafatin ba JSMP atu kontinua servisu hamutuk hodi bele hakbesik liu-tan justisa ba comunidade liuhosi deziminasan informasaun lei formal no ajuda autoridade lokál sira no comunidade iha implementasaun ba regra tara-bandu ne'e.

Iha serimónia revizaun tara-Bandu ne'e, partisipa hosi representante Governu, parte siguransa hanesan Komandante Eskuadra Postu Maucatar, Veteranu, Representante Presidente Autoridade Munisípiu sira, Administradór Postu Administrativu Maucatar, Representante JSMP, estrutura Suku Ogues, Suku Matai, Holpilat, comunidade Suku Debus, representante lia-nain uma lisan sira no comunidade sira hosi suku Oques.

Programa Apoiu Seguransa Komunitáriu (PASK) nu'udar serbisu hamutuk entre JSMP ho The Asia Foundation (TAF) ne'ebé finansia hosi Embaixada Nova Zelandia hodi halo peskiza kona-ba oinsá efeito hosi justisa komunitáriu ba rezolve disputa sira iha comunidade.

Ana Paula Marçal
Diretora Ezekutiva JSMP



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Diresaun e-mail: ana@jsmp.tl

Website: <http://jsmp.tl>

www.jsmp.tl